


## Dateien mit WinZip verpacken

Wi sett hier vöör, dat WinZip op SeEhrn PC installeert is un dat Se dat „klassische“ Utsehn vun WinZip verwennt. Wenn nich, seht Se in’n Workshop „WinZip installeern“ na, woans dat geiht.

### 1. Enkelte Datei verpacken

Se wüllt en enkelte Datei in’n WinZip-Archiv packen – dat warrt ok „zippen“ nöömt. Gaht Se so vör:

- Maakt Se den Windows-Explorer apen un kiekt Se sik de Datei in’t rechte Explorerfenster an.
- Klickt Se mit de rechte Muustast op de Datei.
- In’t Kontextmenü gifft dat den Indrag **WinZip**. He hett en Ünnermenü, ’neem en ganzen Barg zip-verwandte Befehle in steken doot. To’n Verpacken deent de Befehle **Zu Zip-Archiv hinzufügen** un **Hinzufügen zu Dateiname.zip**. Wenn Se en inglesches WinZip hebbt, heet düsse Indrääg **Add to Zip** un **Add to Dateiname.zip**.




- Wenn dat Zip-Archiv jüst so heten schall as de Datei, denn wählt Se den Indrag **Hinzufügen zu Dateiname.zip**.
- Wenn Se WinZip nich köfft hebbt, denn kriggt Se nu dat Hallo-hier-bün-ik-Fenster vun WinZip. Klickt Se op den Knoop **Testversion benutzen**.



Düt Fenster seht Se jümmers bi't Starten vun WinZip, wenn Se dat Programm noch nich köfft hebbt. Bi en köffte Vullverschoon gifft dat dat nich mehr.

- Dat Fenster is weg, un in SeEhrn Explorer seht Se en niege Datei – dat WinZip-Archiv. Dat hett dat charakteristische WinZip-Symbol vörn (dat schall en Ordner in en Aart Schruuvstock ween) un is veel lütter as de Oginaal-Datei. De Dateiendung is .zip.




De Oginaal-Datei is natüürlich ok noch dar. Dat Archiv kümmt einfach dorto, dat deit de nix. De Archivdatei warrt tosätzlich anleggt, WinZip packt einfach en Kopie vun'e Oginaaldatei in; dat Oginaal warrt dorbi nich verännert. Dat gellt ok, wenn Se stückerwat Datein tosamen verpackt. Dat wüllt wi glieks maken.

## 2. Stückerwat Datein verpacken

Faken kümmt dat vör, dat een'n poor mehr Datein, de tosamen höört, in datsülvige Archiv packen will. Wi nehmt eerstmaal an, dat de Oginaal-Dateien alle in'n sülven Ordner liggt. Dat geht denn so:


- Maakt Se den Windows-Explorer apen, so dat Se de Datein in't rechte Fenster sehn köönt.
- Markeert Se alle Datein tohoop. –  
Woans geht dat? So:  
Wenn de Datein alle blangenanner staht, klickt Se de eerste an, denn drückt Se de **Ümschalt**-Taste (de för Grootbookstaven) dal un hollt ehr drückt, un meddewiel klickt Se de letzte Datei in'e Reeg an. Klar!
- Wenn de Datein nich alle blangenanner staht, köönt Se ehr doch tohoop markeern. Dorto



**Düsse Datein woorn mit daldrückte Umschalt-Tast anklickt**


drückt Se man einfach de Taste **Strg** dal un klickt denn (Taste fasthollen!) nananner op de enkelten Datein.

*Düsse Datein woorn mit  
daldrückte **Strg**-Tast  
anklickt*



- Allens markeert? Good. Denn klickt Se mit de rechte Muustast op een vun de markeerten Datein.
- In't Kontextmenü stahnt nu de Befehle **Zu Zip-Archiv hinzufügen** un **Hinzufügen zu ordnername.zip**. Dorbi is *ordnername* de Naam vun den Ordner, 'neem de ganze Ak-schoon jüst in stattfinden deit. Worüm? Na, WinZip wullt Se geern jümmers en sinnvullen Vörslag maken, woans dat Archiv heten kann, dat Se dato k schön komodig hebbt. Bi en enkelt Datei is dat licht. Bi stückerwat Dateien seggt sik WinZip: „Hm, dat sünd fief Datein, da kann ik as Naam nich jichenseen utwählen; ik nehm mal den Naam vun den Ordner, 'neem se in steken doot, dat is bestimmt en goden Sammelbegriff för de Datein.“ (WinZip sett also vörut, dat Se sinnvolle Ordnername anlegt hebbt!)

Wenn Se en inglesches WinZip hebbt, heet düsse Indrääg **Add to Zip** un **Add to ordnername.zip**.




Nu köönt Se sik utsöken, wat dat Archiv den Naam vunden Ordner hebben schall orr nich. Wi geht alle Möglichkeiten tosamen dör.

## 1. Dat Archiv dröff geern so heten as de Ordner, 'neem de Dateien in liggen doot


- Good, denn wählt Se in't Kontextmenü den Indrag **Hinzufügen zu ordnername.zip**.
- Nu kümmt evtl. wedder dat Hallo-Fenster vun WinZip. Klickt Se op **Testversion benutzen**.
- Swupps, de Saak is al erledigt. De Archivdatei schull nu in'n Windows-Explorer to sehn ween. Se landt bi düsse Methode wedder in densülvigen Ordner as de Oginaaldatein.

## 2. Dat Archiv schall anners heten


- Markeert Se de Dateien, rechtsklickt Se ehr un wählt Se ut dat Kontextmenü **WinZip | Zu Zip-Archiv hinzufügen**.



- Dat Programmfenster vun WinZip geht op (ggf. mit Hallo-Fenster), un davor geht glieks de Dialog **Hinzufügen** op.




- Nu mööt Se WinZip vertellen, wo dat Archiv heten schall un woneem dat liggen schall. In dat Feld **Zu Archiv hinzufügen:** is al de Ordner angegeben, 'neem de Oginiaal-Dateien in liggt.  
Wenn Se dat Archiv wirklich in düssen Ordner hebben wullt, denn tippt Se nu einfach achter den Naam, den Se sik för dat Archiv utfunnen hebbt – süh Bild.
- Denn klickt Se **Hinzufügen**.
- Dat niege Archiv mit den Naam, den Se utsöcht hebbt, warrt anlegt. Nu wiest WinZip Se sin eigentliches Programmfenster. Hier seht Se ünner de Symbolleiste de List vun de Dateien, de jüst verpackt worrn sünd, mit ehr Naams, Datum, Oginiaalgrött in kB un – interessant – den Komprimeergraad; also de Angaav, woveel Prozent överflödige Dateigrött („lerrige Bits“) WinZip ut de Datei rutquetscht hett. Faken to'n Wundern, wat dar rutkümmt. Achter'n Komprimeergraad steiht de komprimeerte Grött in kB.




- Se köönt dat Programmfenster nu tomaken. Dat niege Archiv is in'n Windows-Explorer to sehn.

### 3. Dat Archiv schall ok noch woanners landen

- Wenn Se dat Archiv lever in'n annern Ordner harrn, denn gaht Se densülvigen Weg as jüst nu bet na'n Dialog **Hinzufügen**.
- Dor klickt Se op den Knoop **Neu...**
- Se köönt sik nu en annern Ordner för't Archiv utsöken. Dat Fenster, 'neem Se dat doot, funkscheneert jüst so as de gewöhnliche **Speichern**-Dialog in bi-nah alle Programme. Geevt Se in dat Feld **Dateiname** ok glieks den Naam an, den Se sik för't Archiv utfunnen hebbt.








- Wenn Ordner un Archiv-Naam stimmt, klickt Se **OK**, denn in'n **Hinzufügen**-Dialog natüürlich op **Hinzufügen**.
- In't WinZip-Programmfenster kriggt Se nu wedder dat Ergeevnis präsentiert. Se köönt dat Programmfenster nu tomaken. Dat niege Archiv is in'n Windows-Explorer to sehn.


### 3. Datein ut ünnerscheidliche Ordner

Wenn Se Datein ut verscheedene Ordner in datsülvige Zip-Archiv inbinden wüllt, mööt Se in enkelte Schritte vorgahn.


- Maakt Se den Windows-Explorer apen, kiekt Se sik den Inholt vun'n ersten Ordner an und verpackt Se de doren Datein, de Se verpacken wüllt, eerstmaal in'n nieges Zip-Archiv – so, as dat boven beschreven is. Maakt Se dorna ruhig WinZip to, dat deit nix.
- Nu wesselt Se in'n neegsten Ordner, 'neem Se Datein ut in't Archiv steken wüllt. Laat Se in't rechte Explorerfenster den Ordner sin Inholt wiesen un markeert Se de Datein, de Se verpacken wüllt.
- Klickt Se mit de rechte Muustast op een vun de markeerten Datein.
- Wählt Se ut dat Kontextmenü den Indrag **Zu Zip-Archiv hinzufügen**.
- In dat Dialogfenster, dat nu opgeiht, klickt Se op den Knoop **Öffnen...** Mit düssen Knoop maakt Se en Zip-Archiv apen, dat all besteiht.



- Dat Dialogfenster **Archiv öffnen**, dat nu kümmt, funkscheneert jüst so as de **Öffnen**-Dialog vun de mehrsten Programme. Stüürt Se man sutje in den Ordner, 'neem Se tovor dat Archiv in maakt hebbt, un wähl't Se dat Archiv ut.



- Klickt Se **Öffnen**.
- In'n Hinnergrunn kümmt nu all de List vun de Dateien, de all in dat utwähl'te Archiv in stekt. In'n Vörrergrunn is noch dat Dialogfenster.
- Klickt Se op **Hinzufügen**.




- Dat Dialogfenster verkrümelt sik. De Dateien, de nu nieg to dat Archiv tokamen sünd, stah't nu ok in de List vun Dateien in't Archiv.
- Allens is trecht, Se köönt nu WinZip utknipsen.

Wenn Se noch mehr Dateien ut annere Ordner in datsülvige Archiv steken wüllt, mööt Se wedder so vorgahn, as wi dat hier beschreven hebbt.

## Tipps

### Fehler



WinZip meldt bi't Verpacken een Fehler? De Uursaak is faken düt: Een Datei, de Se verpacken wüllt, is noch in en Programm apen! Dat maakt WinZip bannig Buukpien. In de Log-Datei, de WinZip Se in de Fehlermeldung anbeed, steiht dat denn swatt op witt.

Mehrst produzeert WinZip ok bi den Fehler liekers en Archiv-Datei, de heel normaal utsüht. Se kann avers kaputt ween. Smiet Se ehr weg, maakt Se de Datei to, de noch apen weer, un verpackt Se den ganzen Kraam nieg.

### Grote Archive op Disketten

Wi nehmt mal an, Se hebbt keen CD-Brenner un wüllt liekers en orrig großes Archiv transportern – en Archiv von t.B. 10 MB. Dat is natüürlich to groot för een Diskette. Se mööt dat Archiv op stückerwat Disketten opdelen. Woans geht dat? So:

- Wenn Se all en Archiv-Datei maakt hebbt, löscht Se de wedder. De mutt nämlich nieg maakt warrn.
- Markeert Se de Dateien, de Se verpacken wüllt, un ropt Se ut dat Kontextmenü **WinZip** op, as Se dat nu wennt sünd.
- Wenn dat Dialogfenster **Hinzufügen** kümmt, geevt Se as Teel för dat tokamen Archiv dat Diskettenloopwark an, also **A:**.  
Natüürlich mutt dar een lerrige Diskette in't Loopwark ween. Hollt Se babento noch'n paar mehr Disketten praat, je nadem, wa dick dat Archiv warrt.
- Nu klickt Se einfach **Hinzufügen**.
- WinZip leggt nu dat Archiv op de eerste Diskette an, röppt denn, wenn de vull is, automaatsch na de tweete usw. un maakt so en foortlopen Keed ut Archivdateien. De höört alle tosamen; Se brukt ok wedder alle Disketten, dat Se de later wedder richtig utpacken köönt.